

Cadang wujud universiti pertanian tingkat teknologi baharu

KUALA LUMPUR 7 Ogos - Kewujudan sebuah universiti yang memberi tumpuan kepada industri pertanian dilihat amat penting dalam usaha memacu dan memajukan lagi sektor berkenaan pada masa akan datang.

Sehubungan itu, Menteri Pertanian dan Industri Asas Tani, Datuk Salahuddin Ayub berkata, pihaknya berhasrat untuk membangunkan universiti pertanian seperti yang dilakukan Universiti Chulalongkorn dan Universiti Chiangmai di Thailand bagi meningkatkan kemahiran, pengetahuan dan teknologi baharu.

Namun begitu, Salahuddin berkata, pihaknya akan mengadakan perbincangan secara formal dengan Universiti Putra Malaysia (UPM) terlebih dahulu memandangkan buat ketika ini, UPM dikenali sebagai universiti yang membangunkan industri pertanian.

“Idea ini perlu diperhalusi sebaiknya dan perbincangan dua hala bersama UPM perlu diadakan apatah lagi universiti itu juga mempunyai sebuah kampus cawangan yang memberi fokus kepada bidang pertanian di Bintulu, Sarawak.

“Kita mempunyai banyak pilihan. Sekiranya UPM bersetuju kembali fokus mereka kepada pertanian, maka itu adalah lebih baik.



SALAHUDDIN AYUB bersama agen-agen pengembangan pertanian Jabatan Pertanian di Tapak Ekspo Pertanian Malaysia Serdang (MAEPS), Selangor, semalam. -
UTUSAN/MOHD. NAJIB MOHD. NOR

“Namun, sekiranya proses rundingan berjalan lancar dan kedudukan kewangan negara berada pada tahap stabil, saya merasakan penubuhan universiti pertanian baharu ini dapat dilaksanakan dalam tempoh tiga ke empat tahun akan datang,” katanya dalam sidang akhbar selepas

menghadiri program Memperkasa Sistem Pengembangan Jabatan Pertanian di Tapak Ekspo Pertanian Malaysia Serdang (MAEPS) di Serdang, dekat sini hari ini.

Yang turut hadir, Ketua Setiausaha Kementerian Pertanian dan Industri Asas Tani, Datuk Mohd. Sallehhuddin Hassan.

Program selama sehari yang dianjurkan Jabatan Pertanian itu mengumpulkan seramai 681 ejen pengembangan pertanian bertujuan untuk meningkatkan tahap kompetensi pegawai bagi peningkatan produktiviti, kualiti hasil dan pendapatan seterusnya menyumbang kepada pembangunan

ekonomi negara.

Dalam pada itu, Salahuddin memberitahu, kementeriannya akan menyediakan pendekatan dan kursus baharu kepada kesemua ejen pengembangan pertanian seluruh negara dalam usaha meningkatkan pengetahuan dan kemahiran.